

KO TĀ MĀTOU RĀRANGI INGOA KAIWHAKAMĀORI

Kua oti nei te kōrero ko tētahi o ngā mahi a te Taura Whiri, he whakawā, he whakamana i te hunga e hiahia ana kia tū hei kaiwhakamāori. He nui tonu ngā ingoa kua tuhia ki tā mātou rārangi kaiwhakamāori i roto i te whā tau mai i te ōrokohanga o te Taura Whiri.

Heoi anō te āhutatanga whakatuatē mai, kua āhua roa tonu tēnei rārangi e takoto kau ana i roto i te kōnae. Ko te whakapae ināianei kua ngawhewhe haere tēnei taonga, kua kore i whai hua - inā hoki kei wāhi kē pea, kei whenua kē rānei ētahi e noho ana, kua pāngia rānei e te ringa kaha o Aituā, kua kore noa iho rānei i hiahia ki te uru mai ki tēnei momo mahi. Ahakoa pēhea, e tika ana kia mōhio mai mātou, kia taea ai te rārangi kaiwhakamāori nei te whakatikatika, te whakahou.

Nō reira, kei te tonu atu mātou ki a koutou ki ngā kaiwhakamāori i whakamanahia e te Taura Whiri kia whakapā mai ki tō mātou tari me te whakamōhio mai āe rānei kei te hiahia noho mai koutou i te rārangi kaiwhakamāori nei, ā, kei hea koutou e noho ana ināianei.

Mō te hunga kei te hiahia whakauru mai ki ngā whakamātautau kaiwhakamāori a te Taura Whiri, me tuhi mai, me waea mai rānei ki te kaiwhakahaere whakamātautau. Māna e whakamārama te āhua o ngā whakamātautau, kia kite mai koe āe rānei koinei tāu e hiahia ana ki te whai, kāore rānei.

HE HAKU HUARERE

Āe, kei te amuamu anō a ngutu kuia mō te kino o te rangi! Ko tōna tikanga kua tata te ngahuru, engari kāore anō kia rangona-ā-tinanatia te raumati. Kei hea kē te arawheu e ngaro ana? Kei tua o Tāwauwau pea, kei kō atu rānei o kō mai?

Nā, i toko ake te whakaaro i a au, mena ki te āta kimihia, ki te āta titoa rānei he kōrero *pai* mō te huarere, ākene pea ka paihuarere mai! Engari whēuaua tērā te kitea atu o tētahi kupu kotahi hei whakaū i tērā whakaaro ohia ōku.

Kei te kīa tonutia e ētahi, ā tōna wā pā mai ai te matatea. Engari anei au te whakatakē atu nei.

Kei te pai noa iho mena e whakapono ana koe ki aua kōrero, engari ko tāku noa iho e whakaohiti nei, kaua e pepa, kaua e kuku te manawa, kei mate kūrī noa iho koe!

KUA TINO MATE-Ā-MOA TE MOA?

Mena kei te haepapa ngā kōrero e rongorongo ake nei tātou, ākene pea kei te ora tonu te moa. Ki te pērā, he nui ngā kīanga ka taea te paku whakarerekē kia āhua hāngai atu ai ki tēnei āhutatanga whakamīharo kua maea ake i Te Waipounamu i ngā wiki tata nei.

Kāore e kore ko te whakataukī e tino taupatupatu ana, ko te “*mate-ā-moa*”, i te mea kei te mate-ā-kōkako noa iho pea te moa. Arā, kei te matemate haere, engari kāore anō kia korehāhātia.

Ko te whakapae a tētahi i rongorongo nei au, kei te āhua nui tonu pea ngā moa kei ngā koukouoro o Te Waipounamu e huna haere ana. Anei te kōrero māna, “*Ehara taku moa i te moa takitahi, engari he moa takitini.*”

Me pēnei kē ia: *Mate atu he moa, ara mai anō he moa.*

Ahakoa pēhea, mā te aha rawa tātou e mōhio ai āe rānei kei te tika ngā kōrero, he rūkahu noa iho rānei? *Mā te kanohi miromiro* pea.

HE KUPU HOU

HE KUPU TĒNEHI

service	tuku
fault	hapa
double fault	haparua
foot fault	hapawae
out	kei waho
net ball (Let)	i) whakahokinga tuku ii) ripi kairere
volley	waipao
backhand	tāmuri
forehand	tāmua
undercut	tapahi
half volley	tikape
smash	peu
umpire	kaiwawao
love game	kaupeka whiwhi kore
fifteen love	tekau mā rima, kore / (tekau mā rima ki te kore)